



**Sumáriu Kazu
Tribunál Distritál Oekusi
Juñu 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 20

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	8
Artigu 157 KP, artigu 145 KP, konjuga ho artigu 2, 3, no 35(b) no 36 (LKVD)	Ameasa no ofensa ba integridade fízika simples ho natureza violénsia doméstika	2
Artigu 177 KP, 182 KP no artigu 23 KP	Tentativa abuzu seksuál ba menór agravadu	1
Artigu 171 KP	Koasaun seksuál	1
Artigu 154 KP konjuga ho lei no lei numeru 7/2010	Maus-tratus ba kónjuje	2
Artigu 316 KP	Kontrabandu	5
Artigu 260 KP	Danu ho violénsia	1
Totál		20

2. Totál desizaun ne'ebé JSMP monitoriza: 19

Tipu desizaun	Artigu	Númeru
Pena prizaun	Artigu 66 KP	1
Suspensaun ba prizaun nia ezekusaun	Artigu 68 KP	14
Multa	Artigu 67 KP	1
Admoestasaun	Artigu 82 KP	2

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Absolve	-	1
Totál		19

2. Totál kazu sira ne'ebé kontinua prosesu tuir JSMP nia monitorizasaun: 1
B. Deskrisaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0095/21.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 06 Juñu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 02 Outubru 2021, maizumenus iha oras tuku 17:00 lokraik. Momentu ne'e lezada ho kondisaun isin rua fulan hitu no arguidu loke múzika ho lian maka'as lezada dehan ba arguidu atu taka múzika maibé arguidu ho nerboju tebe dala ida iha lezada nia kotuk laran kauza lezada sofre moras no kontinua dudu lezada ho maka'as halo lezada tauk no hakilar. Kazu ne'e aneksu hamutuk ho relatóriu médiku husi PRADET no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no hatene tebe no dudu lezada bele halo lezada sofre moras, maibé arguidu halo aktu ne'e ho hakarak rasik sein haruka husi ema seluk. Depoizde akontesementu arguidu sente hahalok hanesan ne'e ladiak, arrepende ona nia hahalok, diak malu ona to'o agora laiha tan problema seluk, foin primeiravés mai hatan iha tribunál, promote sei larepete ona hahalok ne'e iha futuro, serbisu hanesan toos na'in laiha rendimentu fiksi kada fulan no iha oan na'in rua.

Enkuantu lezada kontinua konfirma faktu hotu iha akuzasaun no deklarasaun husi arguidu rasik. Lezada haktuir tan katak depoizde akontesementu sira diak malu fali no kontinua moris hamutuk nafatin iha uma ida hanesan feen ho laen too agora laiha tan ona problema seluk.

Alegasaun finál

Prokuradór konsidera hahalok arguidu nian preense duni elementu krime ofensa ba integridade fízika simples ho natureza violénsia doméstika hasoru nia feen. Prokuradór

haktuir tan katak tuir lolos lezada isin rua fulan hitu ona no arguidu persija tau matan ba lezada maibé pelu kontrariu arguidu pratika tan hahalok hanesan ne'e hasoru lezada no krime sira hanesan ne'e barak liu akontese ona iha Regiaun Oekusi kompara ho munisípiu sira seluk. Tan ne'e, husu ba tribunál atu aplika pena prizaun ba arguidu tuir artigu 145 KP.

Enkuantu defeza iha nia alegasaun konsidera hahalok arguidu akontese ona hasoru lezada tanba durante iha produsaun ba prova arguidu rasik konfesa integralmente, kolabora diak ho tribunál, sente hahalok hanesan ne'e ladiak no arrepende ona nia hahalok, diak malu ona too agora laiha tan problema seluk, foin primeiravés mai hatan iha tribunál, promete sei larepete tan hahalok ne'e iha futuru, serbisu hanesan toos na'in laiha rendimentu fiksi kada fulan no iha ona oan na'in rua. Tanba ne'e, defeza husu ba tribunál atu aplika pena ne'ebé kmaan ba arguidu tuir nia sala.

Desizaun

Depoisde avalia ba faktu hotu, tribunál prova katak arguidu tebe dala ida iha lezada nia kotuk laran kauza lezada sofre moras no kontinua dudu lezada ho maka'as halo lezada tauk no hakilar.

Bazeia ba faktu provadu sira ne'e hotu no tetu mós sirkunstánsia atenuantes sira hanesan arguidu konfesa, arrepende nia hahalok, diak malu ona ho lezada, foin primeiravés mai hatan iha tribunál no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida suspende tinan ida.

2. Krime ofensa ba integridade fízika simples ho natureza violénsia doméstika

Nú. Prosesu	: 0085/19.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena prizaun fulan 6 suspende ba tinan 1

Iha 06 Juñu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 05 Juñu 2019, maizumenus iha oras tuku 08:00 dadeer, antes ne'e mosu dezentendementu entre arguidu ho lezada kona-ba haruka malu atu kous sira nia oan ne'ebé tanis hela. Ho nune'e arguidu hirus foti ai-gamal sanak ida hodi baku dala ida iha lezada nia ulun rezulta bubu no moras. Arguidu mós kontinua uza ai-gamal refere baku tan dala ida iha lezada nia kabaas parte loos rezulta bubu no sofre moras. Kazu ne'e aneksu hamutuk ho relatóriu médiku husi PRADET no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no depoisde akontesementu arguidu hatene katak hahalok hanesan ne'e ladiak, arrepende nia hahalok no deklarara mós katak komete krime hasoru lezada tanba de'it oan tanis. Arguidu haktuir liután katak diak malu ona ho lezada, foin primeiravés mai hatan iha tribunál, promete sei larepete hahalok hanesan iha futuro, serbisu hanesan toos na'in laiha rendimentu fixu kada fulan, oan na'in tolu no arguidu mak iha responsabilidade ba nia família.

Prokuradór husu ba tribunál atu presinde deklarasaun husi lezada no husi parte defeza mós konkorda. Tanba ne'e, tribunál bazeia ba pedidu ne'e presinde lezada nia deklarasaun tanba iha produsaun ba prova arguidu rasik konfesa.

Alegasaun finál

Prokuradór intende katak arguidu nia hahalok ne'e iha indisius forte pratíka krime ofensa ba integridade fízika simples ho natureza violénsia doméstika hasoru nia feen. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu aplika pena ne'ebé hakerek ona iha artigu 145 KP atu iha futuro arguidu labele kontinua pratíka nia hahalok ne'e hasoru lezada no ema seluk labele halo tuir.

Enkuantu defeza iha alegasaun hateten katak arguidu konfesa faktu hotu iha akuzasaun no depoisde akontesementu arguidu hatene katak hahalok hanesan ne'e ladiak, arrepende nia hahalok. Defeza haktuir tan katak arguidu ho lezada diak malu ona, foin primeiravés mai hatan iha tribunál, promete sei larepete hahalok hahalok hanesan ne'e iha futuro, serbisu hanesan toos na'in laiha rendimentu fixu kada fulan, oan na'in tolu no arguidu mak iha responsabilidade maximu ba iha nia família. Tanba ne'e, defeza solisita ba tribunál atu aplika pena ne'ebé kmaan ba arguidu tuir nia sala.

Desizaun

Depoisde avalia ba faktu hotu, tribunál prova katak arguidu foti ai-gamal sanak ida hodi baku dala ida iha lezada nia ulun rezulta bubu no moras. Arguidu mós kontinua uza ai-gamal refere baku tan dala ida iha lezada nia kabaas parte loos rezulta bubu no moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada, foin primeiravés mai hatan iha tribunál no promete sei la komete tan krime hanesan iha futuro, nune'e tribunál konklui prosesu ne'e no kondena arguidu arguidu ho pena prizaun fulan neen suspende ba tinan ida.

3. Krime ofensa ba integridade fízika simples ho natureza violénsia doméstika

Nú. Prosesu : 0107/21.OEPMK
Kompozisaun Tribunál : Singulár
Juis : Dr. Yudi Pamukas

Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena admoestasaun

Iha 06 Juñu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CN hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 21 Novembru 2021, maizumenus iha oras tuku 22:00 kalan, iha altura ne'eba mosu dezentendementu entre arguidu ho lezada kona-ba sira nia oan ne'ebé tanis, nune'e arguidu basa dala ida iha lezada nia hasan parte loos rezulta lezada sofre moras. Kazu ne'e aneksu hamutuk ho relatóriu médiku husi Ospital Referral Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene basa lezada iha hasan bele halo lezada sofre moras. Arguidu haktuir liután katak depoisde akontesementu arguidu sente hahalok hanesan ne'e ladi'ak, arrepende ona nia hahalok, diak malu ona to'o agora laiha tan problema seluk, foin primeiravés mai hatan iha tribunál, promete sei larepete hahalok ne'e iha futuro, serbisu hanesan toos na'in laiha rendimentu fiksi kada fulan no iha oan na'in ida.

Enkuantu lezada kontinua konfirma faktu hotu iha akuzasaun no deklarasaun husi arguidu rasik. Lezada haktuir tan katak depoisde akontesementu arguidu ho lezada diak malu fali hanesan feen ho laen to'o agora laiha tan ona problema seluk ne'ebé akontese iha sira nia família.

Alegasaun finál

Prokuradór konsidera hahalok arguidu nian preense duni elementu husi krime ofensa ba integridade fízika simples ho natureza violénsia doméstika hasoru nia feen tanba iha produsaun ba prova arguidu rasik konfesa faktu hotu iha akuzasaun. Prokuradór hanoin katak krime sira ne'ebé akontese entermus iha uma laran barak liu kompara ho krime sira seluk. Tanba ne'e atu halo prevensaun iha futuro husu ba tribunál atu aplika pena ne'ebé todan maibé tanba arguidu arrepende ona nia hahalok no promete sei larepete hikas hahalok ne'e iha futuro hasoru lezada, nune'e husu ba tribunál atu aplika pena admoestasaun ba arguidu.

Alende ne'e defeza mós konkorda ho alegasaun prokuradór nian atu aplika pena admoestasaun ba arguidu ho konsiderasau sira katak, arguidu konfesa, arrepende nia hahalok, diak malu ona ho lezada no pomete sei la komete tan krime hanesan iha futuro. maibé karik tribunál iha hanoin seluk, parte defeza husu justisa tuir arguidu nia sala.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte loos rezulta lezada sofre moras.

Bazeia ba faktu provadu hirak ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasaun.

4. Krime ofensa ba integridade fízika simples ho natureza violénsia doméstika

Nú. Prosesu : 0072/21.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 fulan 6 suspende ba tinan 1 fulan 6

Iha 07 Juñu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 23 Jullu 2021, maizumenus iha oras tuku 23:00 kalan, arguidu foti ai-reo (ai-kafé) sanak ida tuda lezada kona iha liman kabun parte loos rezulta kenek, ran sai, bubu no moras. Antes agresaun ne'e arguidu ho lezada hemu tua no depoisde hemu hotu tiha, arguidu ho lezada diskute ho nune'e mosu agresaun ne'e. Kazu ne'e aneksu hamutuk ho relatóriu médiku husi PRADET no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no hatene katak tuda lezada ho ai-reo sanak hanesan ne'e ladiak no bele halo lezada sofre moras. Arguidu haktuir tan katak depoisde akontesementu no sente hahalok hanesan ne'e ladiak, arrepende ona nia hahalok, diak malu ona ho lezada too agora laiha tan problema seluk, antes ne'e mai ona iha tribunál tanba provadu komete krime kondusaun sein karta no segundu mós hetan nafatin pena multa tanba provadu komete krime ofensa ba integridade fízika simples hasoru ema seluk, promete sei larepete tan hahalok ne'e iha futuru, serbisu hanesan toos na'in laiha rendimentu fixu kada fulan no arguidu iha ona oan na'in rua.

Enkuantu lezada kontinua konfirma faktu hotu iha akuzasaun no deklarata katak depoisde akontesementu, arguidu ho lezada dame malu kedas too agora kontinua moris hamutuk nafatin iha uma ida hanesan feen ho laen.

Alegasaun finál

Prokuradór iha nia alegasaun husu ba tribunál atu aplika pena prizaun tinan 1 maibé suspende ba tinan 1 tanba prokuradór konsidera arguidu nia hahalok ne'e provadu no prenze duni elementu krime ofensa ba integridade física simples ho natureza violénsia doméstika hasoru nia feen. Prokuradór reforsa liután katak antes ne'e arguidu mai ona iha tribunál dala rua tanba komete krime seluk maibé arguidu laiha arrependementu ba nia hahalok no kontinua nafatin komete krime.

Enkuantu defeza haktuir katak iha produsaun ba prova, arguidu konfesa faktu integralmente no depoisde akontesementu arguidu sente hahalok hanesan ne'e ladiak no arrepende ona nia hahalok, diak malu ona ho lezada, promete sei larepete hahalok ne'e iha futuru, serbisu hanesan toos nain laiha rendimentu fixu kada fulan, iha oan na'in rua, arguidu ho lezada hamutuk mak bele iha responsabilidade maximu ba iha sira nia família. Tanba ne'e, defaza husu ba tribunál atu aplika pena ne'ebé kmaan tuir arguida nia sala.

Desizaun

Depoisde avalia ba faktu hotu, tribunál prova katak arguidu foti ai-reo (ai-kafe) sanak ida tuda lezada kona iha liman kabun parte loos rezulta kenek, ran sai, bubu no moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada, nune'e tribunál konklui prosesu ne'e no kondena arguidu ho pena prizaun tinan ida fulan neen suspende ba tinan ida fulan neen.

5. Krime ameasa no ofensa ba integridade física simples ho natureza violénsia doméstika

Nú. Prosesu	: 0114/21.OEPMK
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Pena admoestasau

Iha 07 Junu 2022, Tribunál Distritál Oekusi prezide julgamentu leitura sentensa ba krime ameasa no ofensa ba integridade física simples ho natureza violénsia doméstika ne'ebé envolve arguidu RRB hasoru nia inan, iha Distritu Oekusi.

Akuzasaun Prokuradór

Prokuradór akuza katak iha 16 Dezembru 2021, maizumenus iha oras tuku 20:00 kalan. Antes ne'e mosu diskusaun entre arguidu ho lezada tanba arguidu la ajuda serbisu iha uma laran. Husi diskusaun ne'e arguidu ameasa lezada ho lia fuan katak *"hau soe bikan*

ba ó nia oin mak hatene hodi halo lezada tauk no hakilar.” Tuir mai arguidu tebe dala ida iha lezada nia ain-kabun rezulta lezada sofre moras. Kazu ne’e aneksu hamutuk ho relatóriu médiku husi PRADET no fotografia kona-ba aktu violénsia ne’e hasai husi polísia.

Prokuradór akuza arguidu kontra artigu 157 KP kona-ba krime ameasa ho moldura penál to’o tinan 2 ka multa. Prokuradór mós akuza arguidu kontra artigu 145 KP kona-ba ofensa ba integridade fízika simples ho moldura penál to’o tinan 3 ka multa, konjuga ho artigu 2, 3(a), 35(c) no 36 LKVD.

Antes ne’e, tribunál halo tentativa konsiliaun ba arguidu ba krime ameasa no parte rua hakarak dame malu sein kondisaun, tanba depoisde akontesementu arguidu ho nia inan dame malu kedas too agora laiha tan problema seluk, nune’e tribunál konklui prosesu ne’e no omologa pedidu dezistencia keixa sein kondisaun.

Produsaun ba prova sira

Iha julgamentu, arguidu konfesa faktu integralmente no hatene tebe lezada hanesan ne’e ladi’ak no bele halo lezada sofre moras. Arguidu haktuir tan katak depoisde akontesementu, arguidu sente hahalok hanesan ne’e ladiak no arrepende ona nia hahalok, diak malu ona ho lezada too agora laiha tan problema seluk, foin primeiravés mai iha tribunál, promete sei larepete hahalok ne’e iha futuro, dezempregadu sedauk serbisu no dependensia ba arguidu nia inan no aman.

Entretantu lezada kontinua konfirma faktu hotu iha akuzasaun no deklara katak arguidu foin primeiravés baku lezada no depoisde akontesementu lezada ho arguidu kontinua dame malu too agora laiha tan problema seluk ona.

Alegasaun finál

Prokuradór iha nia alegasaun finál husu ba tribunál atu kondena arguidu ho pena prizaun tinan 2 suspende ba tinan 3 ho razaun katak nu’udar oan lamerese atu halo agresaun fízika hasoru lezada hanesan inan no pior liután badiu too hamlaha fila mai uma tebe lezada ne’ebé serbisu mate-an ba prepara hahan ba jantar kalan nian. Prokuradór mós konsidera hahalok arguidu prense duni elementu krime ofensa ba integridade fízika simples ho natureza violénsia doméstika hasoru nia inan no krime refere regista aas iha regiaun Oekusi kompara ho munisípiu sira seluk.

Enkuantu defeza alega katak iha produsaun ba prova, arguidu konfesa faktu integralmente sein rezerva no depoisde akontesementu arguidu sente hahalok hanesan ne’e ladiak no arrepende ona ba hahalok, diak malu ho lezada too agora laiha tan problema seluk, foin primeiravés mai hatan iha tribunál, promete sei larepete hahalok hanesan ne’e iha futuro, dezempregadu seidauk ser bisu no sei iha dependensia ba arguidu nia inan ho aman. Tanba ne’e, defaza husu ba tribunál atu aplika pena ne’ebé justu ba arguidu tuir nia sala.

Desizaun

Depoisde avalia ba faktu hotu, tribunál prova katak arguidu tebe dala ida iha lezada nia ain-kabun rezulta lezada sofre moras.

Bazeia ba faktu provadu hirak ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasaun.

6. Krime ameasa no ofensa ba integridade física simples ho natureza violéncia doméstika

Nú. Prosesu : 0043/21.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 08 Juñu 2022, Tribunál Distritál Oekusi prezide julgamentu leitura sentensa ba krime ameasa no ofensa ba integridade física simples ho natureza violéncia doméstika ne'ebé envolve arguidu VB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 19 Maiu 2021, maizumenus iha oras tuku 01:00 meudia. Antes ne'e arguidu ho lezada diskute malu kona-ba arguidu deskomfia lezada iha relasaun adulteiru ho mane seluk. Ho nune'e arguidu buti dala ida iha lezada nia kakorok no kontinua tebe dala ida iha lezada nia kanotak rezulta lezada sofre moras. Lato iha ne'e de'it maibé arguidu kontinua dehan tan ba lezada ho liafuan katak "*tempu ida hau sei ta'a mate tiha ó*". Kazu ne'e aneksu hamutuk ho relatóriu médiku husi PRADET no fotografia kona-ba aktu violéncia ne'e hasai husi polísia.

Prokuradór akuza arguidu kontra artigu 157 KP kona-ba krime ameasa ho moldura penál to'o tinan 2 ka multa. Prokuradór mós akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Antes tama ba produsaun ba prova, tribunál halo tentativa konsiliaun ba krime ameasa no parte rua mós konkorda hakarak dame malu sein kondisaun, tanba depoisde akontesementu arguidu ho lezada dame malu kedas too agora laiha tan problema seluk. Nune'e tribunál konklui prosesu ne'e no omologa pedidu dezisténsia keixa sein kondisaun.

Produsaun ba prova sira

Iha julgamentu, arguidu konfesa faktu hotu iha akuzasaun no hatene tebe no buti nia feen hanesan ne'e ladiak no bele halo lezada sofre moras. Arguidu haktuir tan katak depoisde akontesementu, arguidu sente hahalok hanesan ne'e ladiak no arrepende ona nia hahalok, diak malu ho lezada too agora laiha ona problema seluk, foin primeiravés mai

hatan iha tribunál, promete sei larepete hahalok ne'e iha futuru, serbisu hanesan toos na'in laiha rendimentu fiksi kada fulan, iha oan na'in 9 no arguidu mak iha responsabilidade ka sustenta nesesidade ba uma laran nian.

Entretantu lezada kontinua konfirma faktu hotu iha akuzasaun no deklara katak arguidu foin primeiravés baku lezada no depoisde akontesementu lezada ho arguidu kontinua dame malu too agora laiha tan problema seluk ona. Lezada haktuir tan katak arguidu ho lezada hamutuk mak foin bele serbisu atu fo-han sira nia oan na'in 9 iha sira ninia família.

Alegasaun finál

Prokuradór husu ba tribunál atu kondena arguidu ho pena prizaun tinan tolu suspende ba tinan tolu, tanba prokuradór konsidera hahalok arguidu nian prenze duni elementu husi krime ofensa ba integridade física simples ho natureza violénsia doméstika hasoru nia inan no krime refere regista aas iha regiaun Oekusi kompara ho munisípiu sira seluk.

Enkuantu defeza alega katak iha produsaun ba prova, arguidu rasik konfesa faktu hotu iha akuzasaun no depoisde akontesementu arguidu mós sente hahalok hanesan ne'e ladiak no arrepende ona nia hahalok, dame malu ona ho lezada too agora laiha tan problema seluk, foin primeiravés mai hatan iha tribunál, promete sei larepete hahalok hanesan iha futuru, serbisu hanesan toos na'in laiha rendimentu fiksi kada fulan no arguidu iha oan na'in sia. Tanba ne'e, defeza husu ba tribunál atu aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu buti dala ida iha lezada nia kakorok no kontinua tebe dala ida iha lezada nia kanotak rezulta lezada sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, nia malu ona ho lezada, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

7. Krime ofensa ba integridade física simples ho natureza violénsia doméstika

Nú. Prosesu : 0014/21.OEOSL
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 08 Juñu 2022, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FSE hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 28 Novembru 2021, maizumenus iha oras tuku 21:00 kalan, arguidu tuku dala ida iha lezada nia kabaas parte loos, basa dala ida iha lezada nia matan parte loos no kontinua basa tan dala ida iha lezada nia inus. Konsekuensia husi arguidu nia agresaun fízika ne'e rezulta lezada sofre moras. Aktu ne'e akontese kuandu lezada ho arguidu diskute malu kona-ba arguidu deskomfia lezada iha relasaun adulteiru ho mane seluk. Kazu ne'e aneksu hamutuk ho relatóriu médiku husi Sentru Saude Oesilo no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no hatene tuku no basa lezada hanesan ne'e ladiak no bele halo lezada sofre moras. Arguidu haktuir tan katak depoisde akontesementu, sente katak hahalok hanesan ne'e ladiak no husu ona deskulpa ba lezada no arrepende ona nia hahalok, diak malu ona ho lezada too agora laiha tan problema seluk, foin primeiravés mai hatan iha tribunál, promete sei larepete hahalok hanesan ne'e iha futuru, serbisu hanesan motorista ho rendimentu kada fulan US\$115.00 no arguidu iha oan na'in ida.

Enkuantu lezada kontinua konfirma faktu hotu iha akuzasaun no deklara katak depoisde akontesementu, arguidu ho lezada dame malu kedas too agora kontinua moris hamutuk nafatin iha uma ida hanesan feen ho laen no arguidu pela primeiravés halo agresaun fízika hasoru lezada. Lezada haktuir tan katak depoisde akontesementu, arguidu karik sente nia hahalok ne'e ladiak hasoru lezada no husu kedas deskulpa ba lezada iha momentu akontesementu ne'e maibé komu lezada nafatin sei hirus arguidu ho ninia hahalok ne'e no kontinua keixa arguidu ba iha polísia OPS-Bobometo.

Alegasaun finál

Prokuradór iha nia alegasaun finál intende katak hahalok arguidu prenze duni elementu krime ofensa ba integridade fízika simples ho natureza violénsia doméstika hasoru nia feen no krime sira envolve membru família barak liu akontese iha Regiaun Oekusi kompara ho munisípiu sira seluk. Tanba ne'e, prokuradór laiha duvida ba faktu sira ne'ebé hakerek ona iha akuzasaun no arguidu rasik konfesa, nune'e husu ba tribunál atu aplika pena prizaun tinan ida suspende ba tinan ida.

Enkuantu defeza alega katak iha produsaun ba prova, arguidu rasik konfesa faktu hotu iha akuzasaun no depoisde akontesementu arguidu mós sente hahalok hanesan ne'e ladiak no arrepende ona ba nia hahalok, diak malu ona ho lezada, promete sei larepete hahalok ne'e iha futuru, serbisu hanesan motorista ho rendimentu kada fulan US\$115.00, iha oan na'in ida no arguidu ho lezada hamutuk mak bele iha responsabilidade maximu ba iha sira nia família. Tanba ne'e, defeza husu ba tribunál atu aplika pena ne'ebé kmaan tuir arguidu nia sala.

Desizaun

Depoisde avalia ba faktu, tribunál prova katak arguidu tuku dala ida iha lezada nia kabaas parte loos, basa dala ida iha lezada nia matan parte loos no kontinua basa tan dala ida iha lezada nia inus.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada no kontinua moris hamutuk hanesan feen ho laen. Nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

8. Krime ofensa ba integridade fízika simples ho natureza violénsia doméstika

Nú. Prosesu : 0018/22.OESIC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1 fulan 6

Iha 13 Juñu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VSN hasoru nia aman, iha Distritu Oekusi.

Akuzasaun Prokuradór

Prokuradór akuza katak iha 04 Marsu 2022, iha oras tuku 17:00 lokraik. Antes ne'e arguidu ho lezadu diskute malu kona-ba lezadu atu faan manu ba ema seluk sein koñesimentu arguidu nian, ho nune'e arguidu tuku dala ida iha lezadu nia inus rezulta kanek ran sai no sofre moras. Kazu ne'e aneksu hamutuk ho relatóriu médiku husi Ospital Referál Oekusi no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(c) no 36 LKVD.

Produsaun ba prova sira

Iha julgamentu, arguidu konfesa faktu integralmente no depoisde akontesementu arguidu hatene katak hahalok hanesan ne'e ladiak no arepende ona nia hahalok. Arguidu haktuir tan katak diak malu ona ho lezadu, foin primeiravés mai hatan iha tribunál, promete sei larepete hahalok ne'e iha futuru hasoru lezadu ka ema seluk, serbisu hanesan natar na'in laiha rendimentu fixu kada fulan no arguidu sei klosan hela hamutuk ho lezadu nu'udar aman.

Enkuantu lezadu kontinua konfirma faktu hotu iha akuzasaun no depoisde akontesementu too agora laiha ona problema seluk.

Alegasaun finál

Prokuradór intende katak arguidu nia hahalok ne'e iha indisius forte pratíka duni krime ofensa ba integridade fízika simples ho natureza violénsia doméstika hasoru nia aman.

Prokuradór reforsa liután katak laiha duvida ba faktu sira hotu iha akuzasaun no la aseita ho hahalok arguidu sein razaun atu oan pratika krime hasoru ninia aman. Tanba ne'e, husu ba tribunál atu aplika pena ne'ebé hakerek ona iha artigu 145 KP.

Entretantu defeza iha nia alegasaun hateten katak arguidu konfesa faktu hotu iha akuzasaun no depoisde akontesementu arguidu hatene katak hahalok hanesan tuku nia aman ladiak no arrepende ona nia hahalok. Arguidu haktuir tan katak diak malu ona ho lezadu, foin primeiravés mai hatan iha tribunál, promete sei larepete hahalok ne'e iha futuro hasoru lezadu ka ema seluk, serbisu hanesan natar na'in laiha rendimentu fixu kada fulan no arguidu sei klosan hela hamutuk ho lezadu nu'udar aman. Tanba ne'e, defeza solisita ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezadu nia inus rezulta kanek ran sai no sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezadu, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

9. Krime maus -tratus ba kónjuje

Nú. Prosesu	: 0128/17.OESIC
Kompozisaun Tribunál	: Kolektivu
Juis	: Dr. Yudi Pamukas : Dr. Hugo da Cruz Pui : Dr. Evangelino Belo
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena prizaun tinan 3 suspende ba tinan 3

Iha 13 Juñu 2022, Tribunál Distritál Oekusi prezide julgamentu leitura akordaun ba krime maus -tratus ba kónjuje ne'ebé envolve arguidu MS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 20 Maiu 2017, maizumenus iha oras tuku 12:00 meiodia. Arguidu lori ai-bebak ida baku dala ida iha lezada nia ain tuur parte karuk kauza naksalak, bubu, metan, kanek no moras. Arguidu kontinua sama iha lezada nia hirus matan kauza moras iha hirus matan no kabun ate halo lezada abortu. Aktu ne'e akontese kuandu sira nia oan tanis no lezada hamrik tarde atu ba kous. Kazu ne'e aneksa hamutuk ho relatóriu médiku husi Sentru Saúde Baocnana no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 154 KP kona-ba krime maus tratus ba kónjuje ho moldura penal too tinan 6 konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu integralmente no hatene hahalok hanesan ne'e ladiak no arrepende ona nia hahalok. Arguidu dehan katak depoisde akontesementu liu tiha fulan rua lezada halai fali ba nia inan/aman iha Indonezia too agora lafila no liu tiha tinan ida arguidu deside hola tan feen segundu oan ida hamutuk oan na'in rua ona, foin primeiravés mai iha tribunál, serbisu hanesan toos na'in laiha rendimentu fixu kada fulan no promete sei larepete hahalok hanesan iha futuru hasoru nia membru família.

Prokuradór husu ba tribunál atu presinde lezada nia deklarasaun inklui testemuña tanba arguidu rasik konfesa. Antes ne'e, tuir ofisial justisa hateten katak depoisde akontesementu lezada husik tiha nia laen halai fali ba iha Nasaun Indonezia too agora lafila.

Alegasaun finál

Prokuradór intende katak laiha duvida ba faktu hotu iha akuzasaun tanba iha produsaun ba prova arguidu rasik konfesa integrelemente. Prokuradór konsidera arguidu nia hahalok ne'e prenze duni elementu krime maus-tratus ba kónjuje no hahalok hanesan ne'e nunca mais atu pratika hasoru lezada nu'udar arguidu nia feen primeiru no konsekuensia husi arguidu nia hahalok ne'e rezulta lezada abortu. Tanba ne'e, prokuradór husu ba tribunál atu aplika pena ne'ebé hakerek ona iha artigu 154 KP atu iha futuru arguidu labele kontinua repete nia hahalok hasoru lezada nu'dar nia feen segundu tanba nia feen primeiru halai tiha ona ba Indonezia, tanba de'it arguidu sama iha nia kanotak rezulta lezada abortu.

Entretantu defeza hanoin katak durante iha produsaun ba prova arguidu kolabora diak no konfesa integrelemente ba faktu hotu iha akuzasaun. Defeza haktuir tan katak depoisde akontesementu arguidu sente hahalok ne'e ladiak no arrepende ona nia hahalok, hola fetu seluk ona tanba depoisde akontesementu liutiha fulan neen lezada halai fali ba nia inan/aman iha Indonezia, arguidu iha oan na'in rua, foin primeiravés mai iha tribunál, serbisu hanesan toos na'in laiha rendimentu fixu kada fulan no promete sei larepete hahalok hanesan iha futuru hasoru nia membru família. Tanba ne'e defeza husu ba tribunál atu aplika pena ne'ebé adekuaudu tuir arguidu nia sala.

Desizaun

Depoisde avalia ba faktu hotu, tribunál prova katak arguidu lori ai-bebak ida baku dala ida iha lezada nia ain tuur parte karuk kauza naksalak, bubu, metan, kanek no moras. Arguidu kontinua sama iha lezada nia hirus matan kauza moras iha hirus matan no kabun ate halo lezada abortu.

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu konfesa, arrepende nia hahalok no promete sei la repete tan krime hanesan iha futuru. Ho nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

10. Krime tentativa abuzu seksuál ba menór ho agravadu

Nú. Prosesu : 0130/20.OESIC
Kompozisaun Tribunál : Kolektivu
Juis : Dr. Hugo da Cruz Pui

Prokuradór : Dr. Evangelino Belo
Defeza : Dr. Yudi Pamukas
Desizaun : Dr. Mateus Nesi
: Dr. Marcelino Marques Coro
: Pena prizaun tinan 5

Iha 17 Juñu 2022, Tribunál Distritál Oekusi prezide julgamentu leitura akordaun ba krime abuzu seksuál ba menór ho agravadu envolve arguidu CQ hasoru lezada (idade tinan 7), iha Distritu Oekusi.

Akuzasaun Prokuradór

Prokuradór akuza katak iha 24 Agostu 2020, maizumenus iha oras tuku 10:00 kalan. Lezada ba apresenta keixa iha Eskuadra Polísia Pante-makasar katak iha loron ho fulan lahatene maibé iha tinan 2010, maizumenus iha oras tuku 12:30 meiodia, bainhira lezada fila husi eskola toba dukur iha kuartu laran, arguidu tama ba kuartu laran lezada lahatene, arguidu hasai lezada nia roupa no tenta atu halo relasaun seksuál ho lezada, maibé lezada hakfodak no dudu monu arguidu husi lezada nia leten no lezada halai sai husi kuartu laran. Kazu ne'e aneksa hamutuk ho relatóriu médiku husi PRADET no fotografia kona-ba aktu violénsia sira ne'e hasai husi Polísia.

Prokuradór akuza arguidu kontra artigu 177 nú. 2 KP kona-ba abuzu sesksuál ba menór ho moldura penál tinan 5 too tinan 15 no artigu 182 KP kona-ba agravaun.

Produsaun ba prova sira

Iha julgamentu, arguidu deklara katak arguidu latama ba iha lezada nia kuartu hodi tenta halo relasaun seksuál ho lezada. Arguidu haktuir tan katak hakiak lezada husi kiik too boot too ikus mai bosok fali ka bobar lia kontra fali arguidu no durante lezada hela ho arguidu, arguidu hadomi tanba arguidu mak iha responsabilidade ba sira ninia nesidade. Arguidu deklara katak lezada sai husi nia uma maizumenus tinan tolu ona no antes ne'e arguidu nunca fó haris no hasai ninia roupa, arguidu mós deklara katak la halo relasaun seksuál ho lezada. Arguidu deklara katak problema ne'e mosu bainhira lezada nia bin sai husi arguidu nia uma hodi problema ne'e mosu no lezada nia bin mak ba hasai lezada husi arguidu nia uma. Arguidu iha oan na'in hitu mesak kaben nain hotu ona, serbisu hanesan toos na'in laiha rendimentu fiksi no foin primeiravés mai hatan iha tribunál.

Entretantu lezada konfirma faktu hotu iha akuzasaun no deklara katak depoisde akontesementu ne'e lezada nia bin mak ba hasai lezada husi arguidu nia uma hodi ba hela hamutuk fali ho sira nia aman. Mezmu nune'e lezada deklara katak durante hela hamutuk, arguidu haree lezada ho diak.

Alegasaun finál

Prokuradór haktuir katak mezmu arguidu nega faktu hotu iha akuzasaun, maibé tuir esperensia komun prokuradór fiar liu ba lezada nia deklarasaun tanba iha possibilidade boot arguidu pratika duni abuzu seksuál hasoru lezada tanba lezada laos arguidu nia oan ka família, maibé tanba momentu ne'e kuandu ukun-an fofoun lezada nia inan-aman husu arguidu atu hela hamutuk hodi sustenta moris lor-loron nian. Prokuradór konsidera

hahalok arguidu nian iha indisius forte pratika krime abuzu seksuál ba menór tinan 7 tanba iha produsaun ba prova lezada rasik konfirma faktu hotu ne'ebé hakerek ona iha akuzasaun. Tanba ne'e, prokuradór husu ba tribunál atu aplika pena ne'ebé hakerek ona iha artigu 177 KP agrava ho artigu 182 KP.

Entretantu defeza haktuir katak durante iha produsaun ba prova arguidu kolabora diak maibé arguidu nega hotu faktu sira ne'ebé husi prokuradór akuza enrelasaun ho abuzu seksuál ba menór. Defeza reforsa liután katak problema ne'e mosu kuandu lezada nia bin sai ona husi arguidu nia uma ate lezada nia bin tenta tan ba hasai lezada husi arguidu nia uma hodi keixa hasoru arguidu enrelasaun ho akuzasaun ne'e. Defeza akresenta liután katak durante lezada hela ho arguidu nunca baku no sempre tau matan ba lezada nia nesesidade ho diak ne'ebé konfirma mós husi lezada rasik. Defeza argumenta liután katak arguidu iha oan na'in hitu mesak kaben nain hotu ona, serbisu hanesan toos na'in laiha rendimentu fiksi no foin primeiravés mai hatan iha tribunál. Tanba ne'e, defeza solisíta ba tribunál kolektivu tetu no haree situasaun no kondisaun sira hotu no husu justisa ne'ebé justu ba arguidu.

Desizaun

Depoide avalia faktu hotu, tribunál konsidera arguidu komete duni krime hasoru lezada, tanba iha akontesimentu ne'e arguidu tenta atu halo relasaun seksuál ho lezada, lezada sente moras hodi dudu tiha arguidu no halai sai tiha ba liur no tanis. Tribunál mós haree katak prosesu ne'e kleur ona no depoide akontesementu too agora arguidu larepete ninia hahalok ne'e no tuir artigu 98 husi KP. Nune'e tribunál halo alterasaun hodi aumenta tan artigu 23 KP kona-ba tentativa.

Bazeia ba faktu provadu sira ne'e, tribunál konsidera arguidu provadu komete krime tentativa violasaun seksuál hasoru lezada. Ho nune'e tribunál konklui prosesu ne'e no kondena arguidu ho pena prizaun tinan lima.

11. Krime danu ho violénsia

Nú. Prosesu	: 0010/19.OEPMK
Kompozisaun Tribunál	: Kolektivu
Juis	: Dr. Hugo da Cruz Pui : Dr. Evangelino Belo : Dr. Yudi Pamukas
Prokuradór	: Dr. Mateus Nesi
Defeza	: Dr. Calisto Tout
Desizaun	: Absolve

Iha 15 Juñu 2022, Tribunál Distritál Oekusi prezide julgamentu leitura akordaun edital ba krime danu ho violénsia ne'ebé envolve arguidu Jefriano Nesi hasoru lezada Julieta Bubun, iha Aldeia Sanane, Suku Costa, Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 07 Maiu 2019, maizumenus iha oras tuku 08:30 dadeer, arguidu uza katana ta'a estraga didin uma nia no koalio katak "*hau sei ta'a mate ema ida*

iha fatin ne'e, no hau pronto tama komarka". Depois arguidu kontinua ta'a rahun kadeira masa ida no gayung ida, halo lezada sente laseguru, ameadu no tauk, tanba arguidu ho lezada hela hamutuk iha uma Estadu nian. Aktu ne'e akontese kuandu arguidu husu osan ba lezada US\$10.00 maibé lezada lakohi fó.

Prokuradór akuza arguidu kontra artigu 260 KP kona-ba danu ho violénsia ho moldura penál tinan 4 too tinan 12.

Produsaun ba prova sira

Prosesu kazu ne'e adia too dala haat ona tribunál mós halo ona edital ba arguidu maibé nafatin lahetan arguidu nia hela fatin too agora. Enkuantu lezada mós mate ona no testemuña mós prokuradór hakerek sala tiha naran iha akuzasaun Andre Antonio Sequeira maibé loloos testemuña ne'e mak naran Jacinta Bubun.

Alegasaun finál

Prokuradór intende katak laiha duvida ba faktu hotu iha akuzasaun tanba altura arguidu halo krime ne'e no testemuña mós iha fatin akontesementu tanba testemuña ho lezada mak hela hamutuk iha uma refere. Prokuradór reforsa liután katak mezmu larona deklarasaun husi arguidu ho lezada rasik maibé prokuradór konsidera aguidu nia hahalok ne'e prenze duni elementu krime danu ho violénsia hasoru lezada. Tanba ne'e, prokuradór husu ba tribunál atu aplika pena ne'ebé hakerek ona iha artigu 260 KP.

Entretantu defeza haktuir katak kuandu iha kazu ruma mak tribunál lakonsege notifika arguidu tutuir malu no tuir lei mós fó dalan ba defeza atu bele reprezenta de'it arguidu perante iha tribunál. Defeza mós haktuir katak tanba lezada mós mate ona nomós iha akuzasaun hakerek sala testemuña nia naran hodi lakonsege notifika testemuña okular refere. Tanba ne'e defeza husu ba tribunál atu fo absolvisaun ba arguidu maibé karik tribunál iha hanoin seluk, parte defeza husu justisa tuir arguidu nia sala.

Desizaun

Depoisde avalia faktu hotu, tribunál prova katak arguidu uza katana ta'a estraga didin uma nia no koalia katak *"hau sei ta'a mate ema ida iha fatin ne'e, no hau pronto tama komarka"*. Depois arguidu kontinua ta'a rahun kadeira masa ida no gayung ida, halo lezada sente laseguru, ameadu no tauk.

Bazeia ba faktu provadu hirak ne'e, tribunál konklui prosesu ne'e no absolve arguidu husi aktu krime refere tanba faktu sira iha akuzasaun ne'e, lezada hato'o iha ofisial justisa de'it laos iha prokuradór.

12. Krime kontrabandu

Nú. Prosesu	: 0117/18.OESIC
Kompozisaun Tribunál	: Kolektivu
Juis	: Dr. Hugo da Cruz Pui : Dr. Evangelino Belo : Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro

Desizaun : Pena prizaun tinan 2 suspende ba tinan 2

Iha 17 Juñu 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve husi arguidu Aleixo de Araujo hasoru Estadu RDTL. Iha Aldeia Usapikolen Suku Bobometo Sub-distritu Oesilo Distritu Oekusi.

Akuzasaun Prokuradór

Prokuradór akuza katak iha 28 Juñu 2018, maizumenus iha oras tuku 23:45 kalan. Arguidu halo importasaun sasan merkadoria tama territoriu Timor-Leste-Oekusi ilegalmente tanba laliu husi Alfandega hodi selu taxa ba Estadu RDTL. Sasan sira ne'ebé arguidu hatama liuhusi dalan illegal mak hanesan; CDI 1, magnet motorizada 1, besi HKSR 15, Gagang motorizada 10, roda motor liur nian 6, ban dalam kaixa 7 no roda motor radial 3. Kazu ne'e aneksa hamutuk ho fotografia kona-ba arguidu nia aktu violénsia ne'e mai husi polísia.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu konfesa integralmente no hatene hahalok hanesan ne'e ladiak no arrepende ona nia hahalok. Arguidu serbisu hanesan xefe gabinete iha secretariu regionál asuntu saude ho rendimentu kada fulan US\$1,200.00, arguidu foin primeiravés mai hatan iha tribunál, oan na'in haat, promete sei larepete hikas hahalok ne'e iha futuru.

Prokuradór husu ba tribunál atu presinde testemuña nia depoimentu no husi parte defeza laiha oposaun. Tanba ne'e, tribunál bazeia ba pedidu ne'e no presinde testemuña nia depoimentu ho konsiderasaun katak durante iha produsaun ba prova arguidu rasik konfesa faktu hotu iha akuzasaun.

Alegasaun finál

Prokuradór hanoin katak laiha duvida ba faktu hotu iha akuzasaun tanba iha produsaun ba prova arguidu rasik konfesa integralmente. Prokuradór konsidera arguidu nia hahalok ne'e preense duni elementu krime kontrabandu no husu ba tribunál atu kondena arguidu ho pena prizaun tinan 2 suspende ba tinan 2.

Entretantu defeza haktuir katak durante iha produsaun ba prova arguidu kolabora diak no konfesa integralmente ba faktu hotu iha akuzasaun. Defeza haktuir tan katak depoisde akontesementu arguidu sente hahalok ne'e ladiak no arrepende ona nia hahalok, arguidu serbisu hanesan xefe gabinete iha secretariu regionál asuntu saúde ho rendimentu kada fulan US\$1,200.00, arguidu foin primeiravés mai hatan iha tribunál, oan na'in haat, promete sei larepete hikas hahalok ne'e iha futuru. Tanba ne'e defeza husu ba tribunál atu fo kastigu tuir arguidu nia sala.

Desizaun

Depoisde avalia faktu hotu ne'ebé produs durante julgamentu tribunál konsidera arguidu nia hahalok ne'e provadu no preense duni elementu krime kontrabandu. Tanba ne'e

tribunál konkluí prosesu ne'e no kondena arguidu ho pena prizaun tinan rua suspende ba tinan rua.

13. Krime ofensa ba integridade física simples ho natureza violência doméstica

Nú. Prosesu : 0033/21.OESIC
Kompozisaun Tribunál : Kolektivu
Juis : Dr. Hugo da Cruz Pui
: Dr. Evangelino Belo
: Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena multa US\$60.00

Iha 17 Juñu 2022, Tribunál Distritál Oekusi prezide julagmentu leitura akordaun ba krime ofensa ba integridade física simples ho natureza violência doméstica ne'ebé envolve arguidu PO hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 10 Abril 2021, maizumenus iha oras tuku 02:00 madrugada. Antes ne'e lezada fó hatene ba arguidu atu labele hemu lanu akompañia ho muzika tanba kalan boot ona maibé arguidu la aseita ho lezada nia liafuan ne'e hodi basa dala ida iha lezada nia tilun hun parte loos no basa dala ida iha lezada nia hasan parte loos. La too iha ne'e de'it, arguidu kontinua sena tan nia liman fuan tama ba iha lezada niaibun laran hodi hateten tan ba iha lezada katak "*ó nia ibun ne'e mak buka mane, ó mós fo osan ba mane hodi hola mane no ó fetu ladiak.*" Kazu ne'e aneksa hamutuk ho relatóriu médiku husi Ospital Referál Oekusi via-PRADET no fotografia kona-ba aktu violência ne'e mai husi polisia.

Prokuradór akuza arguidu kontra artigu 154 kona-ba maus-tratus ba kónjuje ho moldura penál tinan 2 too tinan 6 prizaun.

Produsaun ba prova sira

Iha julgamentu, arguidu konfesa faktu integralmente no hatene hahalok hanesan ne'e ladiak no bele halo lezada sente moras no moe. Depoisde akontesementu arguidu arrepende ona ba nia hahalok, diak malu ona, arguidu iha oan na'in haat, foin primeiravés mai hatan iha tribunál, serbisu hanesan seguransa Gardamor ho rendimentu kada fulan US\$115.00, promete sei larepete tan hahalok hanesan ne'e hasoru lezada ka nia membru família sira no arguidu mak iha responsabilidade maximu ba iha nia família.

Enkuantu lezada kontinua konfirma faktu hotu iha akuzasaun no deklarata katak depoisde akontesementu lezada ho arguidu kontinua dame malu kedas too agora laiha ona problema seluk tan.

Alegasaun finál

Prokuradór intende katak laiha duvida ba faktu hotu iha akuzasaun tanba iha produsaun ba prova arguidu rasik konfesa integralmente. Prokuradór konsidera arguidu nia hahalok

ne'e prenze duni elementu krime maus tratus ba kónjuje hasoru de'it nia feen. Tanba ne'e husu ba tribunál atu kondena arguidu ho pena prizaun tinan 2 suspende ba tinan 2.

Entretantu defeza haktuir katak durante iha produsaun ba prova arguidu kolabora diak no konfesa integralmente ba faktu hotu iha akuzasaun. Defeza haktuir tan katak depoisde akontesementu arguidu sente hahalok ne'e ladiak no arrepende ona nia hahalok, diak malu ona, arguidu iha oan na'in haat, foin primeiravés mai hatan iha tribunál, serbisu hanesan seguransa Gardamor ho rendimentu kada fulan US\$115.00, promete sei larepete tan hahalok hanesan ne'e hasoru lezada ka nia membru família sira no arguidu mak iha responsabilidade maximu ba iha nia família. Tanba ne'e defeza husu ba tribunál atu aplika pena ne'ebé adekuadu tuir arguidu nia sala.

Desizaun

Depoisde tribunál avalia faktu hotu, tribunál prova katak basa dala ida iha lezada nia tilun hun parte loos no basa dala ida iha lezada nia hasan parte loos. La too iha ne'e de'it, arguidu kontinua sena tan nia liman fuan tama ba iha lezada nia ibun laran hodi hateten tan ba iha lezada katak *"ó nia ibun ne'e mak buka mane, ó mós fo osan ba mane hodi hola mane no ó feto ladiak."*

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada, foin primeiravés mai hatan iha tribunál no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena multa US\$60.00 ho taxa diariu kada loron 0.50 sentavus durante loron 120. Tribunál mós fiksa pena alternativa durante loron 80 prizaun bainhira arguidu la kumpri pena multa refere.

14. Krime koasaun seksuál

Nú. Prosesu	: 0115/20.OESIC
Kompozisaun Tribunál	: Kolektivu
Juis	: Dr. Yudi Pamukas : Dr. Hugo da Cruz Pui : Dr. Evangelino Belo
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Pena prizaun tinan 2 suspende ba tinan 2

Iha 20 Juñu 2022, Tribunál Distritál Oekusi prezide julgamentu leitura akordaun ba krime koasaun seksuál ne'ebé envolve husi arguidu ESC hasoru lezada NNA. Iha Distritu Oekusi.

Akuzasaun Prokuradór

Prokuradór akuza katak iha 09 Agosto 2020, maizumenus iha oras tuku 18:00 kalan. Antes ne'e lezada nia bin haruka lezada ba hola Masako ho sutate (*kecap*) iha kioske no kuandu lezada hola hotu tiha fila ba uma, arguidu hamrik iha lezada nia tiun nia portaun oin. Bainhira lezada atu liuhusi portaun nia oin arguidu lolo liman buti kedas lezada nia hirur matan parte karuk lezada hakfodak, trauma, moe, lasatisfas ho arguidu nia hahalok

ne'e tanba arguidu ho lezada iha relasaun nu'udar primu no prima. Kazu ne'e aneksa hamutuk ho fotografia sira ne'ebé hasai husi Polísia.

Prokuradór akuza arguidu kontra artigu 171 KP kona-ba krime koasaun seksuál ho moldura penál tinan 2 too tinan 8 prizaun.

Produsaun ba prova sira

Iha julgamentu, arguidu deklara katak iha akontesimentu ne'e arguidu tenta atu dudu luan portaun mak arguidu nia liman kona iha lezada nia susun parte karuk. Arguidu deklara katak relasaun entre arguidu ho lezada hanesan primu ho prima no depoisde akontese arguidu ho lezada tuur hamutuk resolve tuir família no arguidu foti tais feto ida hatais fali lezada hanesan ninia prima. Arguidu arrepende nia hahalok ne'e tanba altura ne'e laiha intensaun atu kaer lezada nia susun, maibé dudu portaun mak liman kona lezada nia hirus matan. Arguidu hanesan estudante no sei klosan.

Enkuantu lezada kontinua konfirma faktu hotu iha akuzasaun katak arguidu kaer duni maibé lais de'it no lezada ho arguidu dame malu ona no arguidu fó hatais fali lezada ho tais feto ida. Lezada dehan tan katak hahalok arguidu nian halo lezada sente hakfodak, trauma, moe no lasatisfetu ho hahalok sira hanesan ne'e.

Alegasaun finál

Prokuradór konsidera arguidu nia hahalok ne'e iha duni indisius forte pratika krime koasaun seksuál tanba hahalok arguidu nian prejudika tebes psikologia lezada nian hodi halo lezada hakfodak, trauma ho atetudi sira hanesan ne'e, moe no lasatisfetu ho arguidu ninia hahalok ne'e. Tanba ne'e, prokuradór husu ba tribunál atu aplika pena prizaun tinan 2 suspende ba tinan 2 ba arguidu.

Entretantu defeza haktuir katak durante iha produsaun ba prova arguidu kolabora diak hodi konfesa ba faktu sira maibé iha momentu ne'ebé arguidu ho intensaun atu loke tan portaun ne'e hodi dalan luan mak lezada mós nafatin lao hodi arguidu nia liman kona iha lezada ninia hirus matan hanesan iha lezada nia deklarasaun katak arguidu nia liman kona lezada nia hirus matan lalais de'it. Defeza akresenta liután katak arguidu remata ona eskola maibé seidak hetan serbisu no arguidu mós sei klosan. Tanba ne'e, defeza solisita ba tribunál atu absolve arguidu tanba arguidu laiha intensaun atu kaer lezada nia hirus matan ho razaun katak arguidu ho lezada sei iha relasaun família maibé karik tribunál iha hanoin seluk, parte defeza husu justisa tuir arguidu nia sala.

Desizaun

Depoisde avalia faktu hotu, tribunál prova katak bainhira lezada atu liuhusi portaun nia oin arguidu lolo liman buti kedas lezada nia hirus matan parte karuk.

Bazeia ba faktu provadu hirak ne'e no tetu mós ho sirkunstánsia atenuantes sira hanesan arguidu arrepende ona nia hahalok no arguidu fó ona tais feto ida hatais fali ninia prima, ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

15. Krime maus-tratus ba kónjuje

Nú. Prosesu : 0072/21.OESIC
Kompozisaun Tribunál : Kolektivu
Juis : Dr. Hugo da Cruz Pui
: Dr. Evangelino Belo
: Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 fulan 6 suspende ba tinan 2

Iha 20 Juñu 2022, Tribunál Distritál Oekusi prezide julgamentu leitura sentensa ba krime maus- tratus ba kónjuje ne'ebé envolve arguidu AA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 18 Jullu 2021, maizumenus iha oras tuku 20:00 kalan, arguidu rakut lezada nia fuuk dala ida rezulta lezada sofre moras tanba lezada fó osan ba arguidu nia maluk impresta sein koñesementu arguidu nian.

Tuir mai 19 Jullu 2021, iha oras tuku 07:00 dadeer, arguidu kontinua trata no tolok lezada no kontinua tuda lezada ho kopu masa ne'ebé kafe iha hela kona iha lezada nia ulun no fakar iha lezada nia ulun rezulta bokon no moras. Arguidu mós kontinua rakut lezada nia fuuk dala ida too lezada monu tun iha rai. Arguidu kontinua rasta lezada rezulta lezada nia liman sikun loos hetan kanek kois no halo lezada sofre moras. Latoos iha ne'e de'it arguidu kontinua lori ai-sar baku dala ida iha lezada nia ulun parte karuk. Antes agresaun ne'e, arguidu ho lezada diskute malu kona-ba lezada tarde entrega xave kuartu nian ba arguidu. Kazu ne'e aneksa hamutuk ho relatóriu médiku husi PRADET no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 154 KP kona-ba krime maus-tratus ba kónjuje ho moldura penal tinan 2 too tinan 6 prizaun konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun, arguidu mós deklara katak diak malu ona, depoisde akontesementu too agora labaku ona lezada, ba oin sei lahalo ona krime hanesan, hola malu iha 2016, mai ona iha tribunál dala ida no krime ida antes tanba arguidu komete krime kondusaun sein karta, serbisu hanesan peskador ho rendimentu kada fulan US\$100.00, oan na'in 1 no foin primeiravés mai hatan iha tribunál no arguidu mak iha responsabilidade ba iha ninia família.

Alende ne'e lezada, kontinua konfirma faktu hotu iha akuzasaun, Lezada mós deklara katak depoisde akontesementu arguidu ho lezada kontinua dame malu kedas too agora laiha tan problema seluk no lezada mós perdua ona arguidu.

Prokuradór husu ba tribunál atu presinde testemuña nia depoimentu no husi parte defeza konkorda ho pedidu ne'e, tanba ne'e, tribunál presinde testemuña nia depoimentu tanba durante iha produsaun ba prova arguidu rasik konfesa ba faktu sira hotu iha akuzasaun no konfirma mós husi lezada rasik

Alegasaun finál

Prokuradór haktuir katak hahalok arguidu nian iha indisius forte prátika krime maus tratus ba kónjuje hasoru de'it nia feen no iha possibilidade lezada laiha forsa atu halo reasaun kontra arguidu nia aksaun ne'e. Tanba ne'e, prokuradór husu ba tribunál atu aplika prizaun tinan 2 suspende ba tinan 3.

Entretantu defeza hanoin katak durante iha produsaun ba prova arguidu konfesa integralmente ba faktu hotu iha akuzasaun no depoisde akontesementu arguidu arrepende no diak malu ona ho lezada too agora laiha tan problema seluk. Defeza dehan tan katak arguidu promete ba oin sei lahalo ona, hola malu iha 2016, mai ona iha tribunál dala rua ona no krime ida antes tanba arguidu komete krime kondusaun sein karta, serbisu peskador ho rendimentu kada fulan US\$100.00, oan na'in 1, foin primeiravés mai hatan iha tribunál no arguidu mak iha responsabilidade ba iha ninia família. Tanba ne'e, defeza husu ba tribunál atu fó justisa ne'ebé justu ba arguidu tuir nia sala.

Desizaun

Depoisde avalia faktu hotu, tribunál prova katak arguidu provadu komete krime maus-tratus ba kónjuje hasoru lezada.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok diak malu ona ho lezada. Nune'e tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua.

16. Krime kontrabandu

Nú. Prosesu	: 0032/21.OESIC
Kompozisaun Tribunál	: Kolektivu
Juis	: Dr. Hugo da Cruz Pui : Dr. Evangelino Belo : Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun tinan 3 suspende ba tinan 3

Iha 21 Juñu 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Lucas Ase hasoru estadu RDTL, iha Aldeia Saben, Suku Bobometo, Sub-distritu Oesilo Distritu Oekusi.

Akuzasaun Prokuradór

Prokuradór akuza katak iha 10 Janeiro 2021, maizumenus iha oras tuku 21:00 kalan. Arguidu importa sasan husi Indonezia tuir dalan ilegal sasan sira ne'e mak hanesan mina gazoel litru 40 ho tua whisky kaixa ida 12 grafas. Arguidu hetan kapturasaun husi Polísia Unidade Patrohliamentu Fronteira (UPF) iha Poto no halo kedas apreensaun ba kombustivel sira no tua whisky tanba laliu husi Alfandega hodi selu taxa ba Estadu RDTL. Kazu ne'e aneksa hamutuk ho fotografia kona-ba aktu ilegal (objetu) ne'e hasai husi polísia.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no hatene hahalok hanesan ne'e ladiak, arrepende ona nia hahalok. Arguidu ba iha poto hola gazoel litru 40 no tua whisky kaixa ida, foin primeiravés mai hatan iha tribunál, antes ne'e nunca hatama sasan, iha oan na'in haat.

Prokuradór husu ba tribunál atu presinde testemuna husi UPF no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e presinde testemuña nia depoimentu no pasa kedas ba iha alegasaun finál.

Alegasaun finál

Prokuradór haktuir katak laiha duvida ba faktu hotu ne'ebé hakerek ona iha akuzasaun tanba iha produsaun ba prova arguidu rasik konfesa integralemente. Prokuradór konsidera arguidu nia hahalok ne'e prenze duni elementu krime kontrabandu no husu ba tribunál atu aplika pena prizaun tinan 2 suspende ba tinan 2.

Entretantu defeza haktuir katak durante iha produsaun ba prova arguidu kolabora diak hodi konfesa faktu integralmente iha akuzasaun. Defeza haktuir tan katak depoisde akontesementu arguidu sente katak hahalok ne'e ladiak no arepende ona ba nia hahalok, tanba ne'e husu ba tribunál atu kondena arguidu tuir nia sala.

Desizaun

Depoisde avalia faktu hotu, tribunál prova katak Arguidu importa sasan husi Indonezia tuir dalan ilegal sasan sira ne'e mak hanesan mina gazoel litru 40 ho tua whisky kaixa ida 12 grafas.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok diak malu ona ho lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

17. Krime kontrabandu

Nú. Prosesu	: 0003/20.OESIC
Kompozisaun Tribunál	: Koletivu
Juis	: Dr. Hugo da Cruz Pui : Dr. Evangelino Belo : Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun tinan 2 suspende ba tinan 2 ba kada arguidu

Iha 21 Juñu 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Cipriano Sasi ho Antonio Ricardo da Cunha Texeira,

hasoru Estadu RDTL, iha Aldeia Saben, Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 31 Dezembru 2019, maizumenus iha oras tuku 20:34 kalan. Arguidu sira hamutuk importa motorizada revo-vit rua husi Indonezia tuir dalan illegal iha fatin Noel-ekat. Momentu ne'e kuandu arguidu sira halo hela importasaun ba motorizada hirak ne'e no husi UPF halo kedas kapturasaun ba arguidu sira no halo kedas aprensaun ba motorizada hirak ne'e tanba arguidu sira halo importasaun husi Indonezia tama teritoriu Timor-Leste laliu husi Alfandega hodi selu taxa ba Estadu RDTL. Kazu ne'e aneksa hamutuk ho fotografia kona-ba aktu illegal (objetu) ne'e hasai husi polisia.

Prokuradór akuza arguidu sira kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu sira konfesa integralmente ba faktu sira iha akuzasaun no hatene hahalok hanesan ne'e ladiak no arrepende ona ba sira nia hahalok. Arguidu Cipri sosa motor honda-revo-vit ho valor osan US\$400.00 no arguidu Antonio sosa motor honda-vit ho valor osan US\$550.00. Arguidu Cipriano iha oan na'in lima, toos na'in, foin primeiravés mai hatan iha tribunál. Enkuantu arguidu Antonio dezempregadu, sei klosan no foin primeiravés mai hatan iha tribunál.

Prokuradór husu ba tribunál atu presinde testemuña husi polisia UPF no husi parte defeza konkorda ho pedidu ne'e, tanba ne'e, tribunál bazeia ba pedidu ne'e no preside testemuña nia depoimentu no pasa kedas ba iha alegasaun finál.

Alegasaun finál

Prokuradór intende katak laiha duvida ba faktu hotu ne'ebé hakerek ona iha akuzasaun tanba iha produsaun ba prova arguidu sira rasik konfesa integralmente. Prokuradór konsidera arguidu sira nia hahalok ne'e prenze duni elementu krime kontrabandu no husu ba tribunál atu aplika pena prizaun ba arguidu sira tinan 2 suspende ba tinan 2.

Entretantu defeza hanoin katak durante iha produsaun ba prova arguidu sira kolabora diak hodi konfesa faktu integralmente iha akuzasaun. Defeza haktuir tan katak depoisde akontesementu arguidu sira sente katak hahalok ne'e ladi'ak no arrepende ona sira nia hahalok, arguidu sira foin primeiravés mai hatan iha tribunál, Tanba ne'e defeza solisita ba tribunál kolektivu atu aplika pena ne'ebé adekuadu tuir arguidu na'in rua ninia sala.

Desizaun

Depoisde avalia faktu hotu, tribunál konsidera arguidu sira nia hahalok ne'e prenze duni elementu krime kontrabandu.

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu sira konfesa, arrepende ona sira nia hahalok, Nune'e tribunál konklui

prosesu ne'e no kondena arguidu sira ho pena prizaun tinan rua suspende ba tinan rua ba kada arguidu.

18. Krime kontrabandu

Nú. Prosesu : 0128/20.OESIC
Kompozisaun Tribunál : Kolektivu
Juis : Dr. Yudi Pamukas
: Dr. Hugo da Cruz Pui
: Dr. Evangelino Belo
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 2 suspende ba tinan 2 ba kada arguidu

Iha 23 Juñu 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Joao Colo ho Damião Timo hasoru Estadu RDTL, iha Aldeia Usapikolen, Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 02 Setembru 2020, maizumenus iha oras tuku 23:45 kalan. Arguidu sira halo importasaun sasan hanesan tua whisky, mina gasolina ho gazoel tama territoriu Timor-Leste ilegalmente tanba laliu husi Alfandega hodi selu taxa ba Estadu RDTL. Arguidu Joao hatama gasolina litru 55 no gazoel litru 75. Enkuantu arguidu Damiao hatama tua whisky kaixa 2 hamutuk 24 grafas no gasolina litru 40.

Prokuradór akuza arguidu sira kontra artigu 316 KP kona-ba krime kontrabandu ho moldura penál tinan 2 too tinan 6 prizaun ka multa.

Produsaun ba prova sira

Iha julgamentu, arguidu sira konfesa integralmente ba faktu hotu iha akuzasaun no hatene hahalok hanesan ne'e ladiak, arrepende ona sira nia hahalok. Arguidu sira hatene katak tuir lei bandu atu halo importasaun sasan sira hanesan ne'e. Arguidu Joao Colo oan na'in 8 no Damiao iha oan na'in haat, servisu toos na'in hotu no arguidu sira foin primeiravés mai hatan iha tribunál.

Prokuradór husu ba tribunál atu presinde testemuña nia depoimentu no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e no presinde testemuña nia depoimentu ho konsiderasaun katak durante iha produsaun ba prova arguidu rasik konfesa faktu hotu iha akuzasaun.

Alegasaun finál

Prokuradór haktuir katak laiha duvida ba faktu hotu iha akuzasaun tanba iha produsaun ba prova arguidu sira rasik konfesa integralmente. Prokuradór konsidera arguidu nia hahalok ne'e prenze duni elementu krime kontrabandu no husu ba tribunál atu kondena arguidu na'in rua ho pena prizaun tinan 2 suspende ba tinan 2.

Entretantu defeza haktuir katak durante iha produsaun ba prova arguidu sira kolabora diak no konfesa integralmente ba faktu sira hotu iha akuzasaun. Defeza haktuir tan katak depoisde akontesementu arguidu sente hahalok ne'e ladiak no arrepende ona sira nia hahalok no promete sei larepete hikas hahalok ne'e iha futuru. Tanba ne'e defeza husu ba tribunál atu fo kastigu tuir arguidu sira nia sala.

Desizaun

Depoisde tribunál avalia faktu hotu ne'ebé produs durante julgamentu tribunál konsidera arguidu sira provadu komete krime kontrabandu.

Bazeia ba faktu provadu sira ne'e hotu no tetu mós ho sirkunstánsia atenuantes sira hanesan arguidu sira konfesa, arrepende ona sira nia hahalok no promete sei la komete tan krime hanesan iha futuru. Nune'e tribunál konklui prosesu ne'e no kondena arguidu sira ho pena prizaun tinan rua no suspende ba tinan rua ba kada arguidu.

19. Krime kontrabandu

Nú. Prosesu	: 0225/17.OESIC
Kompozisaun Tribunál	: Kolektivu
Juis	: Dr. Yudi Pamukas : Dr. Hugo da Cruz Pui : Dr. Evangelino Belo
Prokuradór	: Dr. Pedro Baptista Aleixo dos Santos
Defeza	: Dr. Calisto Tout
Desizaun	: Pena prizaun tinan 2 suspende ba tinan 2

Iha 29 Juñu 2022, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Arnaldo Beno hasoru Estadu RDTL, iha Aldeia Hoeneno, Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 14 Dezembru 2017, maizumenus iha oras tuku 14:50 meidia. Arguidu halo importasaun kombustivel husi Indonezia tama territoriu Timor-Leste ilegalmente tanba laliu husi Alfandega hodi selu taxa ba Estadu RDTL. Sasan kombustivel sira mak hanesan; mina gazoel litru 165, mina gazolina 155 litru no mina rai litru 15.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 too tinan 6 prizaun ka multa.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no hatene hahalok hanesan ne'e ladiak no kontra lei timor-leste. Depoisde akontesementu, arguidu arrepende ona nia hahalok, selu ona taxa liuhusi konta bankaria prokuradór nian. Arguidu hatene katak tuir lei bandu atu halo importasaun ba sasan sira hanesan ne'e laliu husi Alfandega hodi selu taxa, arguidu kaben na'in no iha oan na'in tolu no foin primeiravés mai hatan iha tribunál.

Prokuradór husu ba tribunál atu presinde testemuña nia depoimentu no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e no presinde testemuña nia depoimentu ho konsiderasaun katak durante iha produsaun ba prova arguidu rasik konfesa hotu faktu iha akuzasaun.

Alegasaun finál

Prokuradór haktuir katak laiha duvida ba faktu hotu iha akuzasaun tanba iha produsaun ba prova arguidu rasik konfesa integralmente. Prokuradór konsidera arguidu nia hahalok ne'e prenze duni elementu krime kontrabandu no barak liu krime sira hanesan ne'e sempre akontese bebeik iha fronteira. Tanba ne'e, prokuradór husu ba tribunál atu kondena arguidu ho pena prizaun tinan 2 suspende ba tinan 2.

Entretantu defeza haktuir katak durante iha produsaun ba prova arguidu kolabora diak no konfesa integrelemnte ba faktu sita hotu iha akuzasaun. Defeza haktuir tan katak depoisde akontesementu arguidu sente hahalok ne'e ladiak no arepende ona nia hahalok, arguidu serbisu hanesan toos na'in laiha rendimentu fiksi kada fulan, arguidu foin primeiravés mai hatan iha tribunál, oan na'in tolu, promete sei larepete hikas hahalok ne'e iha futuro. Tanba ne'e defeza husu ba tribunál atu fó kastigu tuir arguidu nia sala.

Desizaun

Depoisde avalia ba faktu sira ne'ebé produs durante julgamentu, tribunál konsidera arguidu provadu komete krime kontra bandu.

Bazeia ba faktu provadu hirak ne'e hotu no tetu mós ho sirkunstánsia atenuantes sira hotu hanesan arguidu konfesa, arrepende ona nia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>

